

**Perkukuh nilai toleransi – TPM
Utusan Online
Februari 07, 2012**

KUALA LUMPUR 6 Feb. - Tan Sri Muhyiddin Yassin meminta semua lapisan masyarakat supaya terus memperkukuhkan nilai toleransi sesama kaum sebagai asas perpaduan dan keharmonian yang dikecapi negara selama ini.

Timbalan Perdana Menteri berkata, tahap toleransi yang tinggi di kalangan masyarakat pelbagai kaum negara ini amat istimewa dan tidak akan mampu dinikmati di negara-negara lain di dunia.

Justeru, kata beliau, kemakmuran yang dinikmati negara sekarang perlu dipelihara supaya keadaan itu berkekalan di masa hadapan.

"Hayati dan laksanakan apa juga langkah yang boleh menguatkan lagi ikatan perpaduan di antara penduduk pelbagai kaum di negara ini.

"Jangan sesekali memandang remeh kepentingan toleransi sesama kaum kerana ikatan perpaduan yang lemah akan menjadi punca timbulnya sikap permusuhan sekali gus memusnahkan usaha merapatkan kaum-kaum di negara ini yang telah dimulakan sejak negara mencapai kemerdekaan," katanya.

Beliau berkata demikian dalam satu kenyataan di sini hari ini, sempena perayaan Thaipusam yang akan diraikan masyarakat Hindu esok.

Muhyiddin berkata, adalah sesuatu yang unik apabila perayaan bersifat agama untuk kaum India itu berjaya menggamit minat orang luar untuk datang ke negara ini melihat sendiri sambutan yang diadakan secara besar-besaran.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0207&pub=Utusan_Malaysia&sec=Dalam_Negeri&pg=dn_02.htm